



GETHSEMANI RÂWL

(Monthly Prayer Bulletin of Hmar Christian Fellowship Delhi)

Volume No. III | Issue No. 3 | Thlaṭau (March), 2025

‘Ienga khawm lunginzîng naw ro, iengkimah ṭawngṭai le hniin, lawmthu hril sa peiin, in dithai chu Pathien kuomah inhriettirin um lem raw se’ (Filippi 4:6)

Thilthawhai 1: 23 Chuongchun, Josefa, (Barsaba amanah Justa an ti bok) le Mathia chu pakhat lem lem thlang an rawt a. 24 “Lalpa, mi po po lungril i hriet a. A tirko nina le rongbawlna sin tlansantu Juda Iskariot hmun hluotu dingin hieng mi pahnihai lai hin a tu lem am i thlang mi hung inhriettir rawh” tia trongtraiin an hni a. Vawisûna HCFD inthlang ding hih, lungril le titak zeta, Pathienrawn zing puma, ei nei theina dingin ei Bible châng târlang hih Lalpa’n ei rênga chan sengah mal mi sâwm pêk raw seh!

DAMNAW THENKHATHAJ TA DJN

•Pi Lallawmsang, Pi Rebecca Buhril, Pu Sieka Singson, Pi Joani Darhienhnem, Pi Esther Lalramhuol, Pi Linda Chhangte, Pu Sanglawr Pakhuongte, Pu Lalhmunlien le Pu Rinlien Pakhuongte hai cancer a nthawh an hung dam fai hieuna dingin •Pu Thangsang Varte, pânggaia a lăwn theina ding le Pu Lalsiemlien Khawbung a dam peina dingin •Pi Lalremsang, lungphu le medicine doctor pana inenkawl •Pi BK Rose, lu inat zo, a dam peina dingin •PNK, Elizabeth Varte, lu-thluok a thisen lut leia Guwahati-a inat zo, a dam peina din. •Pu Santhang le NK, Rachel, dialysis thawa inenkawl zing, an hung dam peina dingin •

04.03.2025 (Thawleni)

•Shikohabad, UP Mission Field: I. Kohran mipuihai Pathien thua hmâ an sawn peina ding le ringna detindo tak an nei peina dingin. Thawlawm le sawmapakhathai khawm pêk nuomna lungril an hung nei peina ding khawmin. II. Kohran member-haiin an sâng-le-kuohai, an sinthawpuihai le mi dang danghai kuomah Chanchin ṭha an hril dar peina dingin. III. Ramhuoi sawisak an um zeu zeu hlak a, thlarau ṭhalo a inthawka an him tlangna dingin. Tlangvâl pakhat (Mohan, ama hi mi thar a nih) Pathienni inkhawmnaa ṭawngṭaina nei hunah a buoi hlak a, ama khawma zalenna a chang vatna dingin.

05.03.2025 (Nilaini)

•HCFD Nilaini Zân ṭawngṭai Inkhâwm-Inkhâwm Keihruoit: Pu Lallawmum Songate, Thuhrlitu: Pi Caroline Lalremzo
•Vawisûn (March 5, 2025) hin Bethany Convent School exam an ṭan ding. Naupanghaiin exam ṭha taka an hmasuon seng theina dingin.
•Ei member Nk. Ruth Zoṭahnieng Sinatein a enkawl Parvah Tuition Centre-a naupanghai annual exam pe theiin an um a, tulai hin exam an nei a, rizal ṭha tak leh an inchûkna an sunzawm pei theina dingin.

06.03.2025 (Ningani)

•Shiv Vihar-a rawngbawlna le inzawmin: I. Lawmthu hrilna ding-February ni 10 khan mi 8 in Lalpa Isu chu Lal le sandamtuah pawmin, baptisma an chang a, rawngbawlna sukhrintu ei pa Pathien kuomah lawmthu hril ei tiu. II. Tukum January thla sâng khan Lalpa’n mi thar (new contact) 10 lai ami pêk a, February thla sâng khan mi 14 lai a mi pêk belsa peia, an rêngin mi 24 an nih. Pathien kuomah lawmthu hrilin sandamna an hriet chieng theina dingin ṭawngṭaipui zing ei tiu.

07.03.2025 (Zirtâwpni)

•Tuolsûng: I. Inchûklaihaiin kumtâwp exam an nei mêk a, ṭha taka exam an zo seng theina dingin. Sin zawng/competitive exam pelai mêk le interview hmasuon ding khawm an um a, an

hung hlawtlingna dingin. II. Sawrkâr le private-a sinthawtuhai khawmin tuta thla sâng hin sin ṭha taka an thaw seng theina dingin. III. Mimal sumdâwngtuhai khawmin hlâwk le tluong taka hma an lâk theina dingin. IV. Ei khawtlângah vântlâng hrisêlna ṭha a umna dingin.

08.03.2025 (Inrinni)

•HCFD Nuhmei Deptt. 2nd Saturday Inkhâwm-Inkhâwm Keihruoit: Pi Grace Khawbung, Ṭantu: Pi Esther Amaw, Fellowship le inṭawngṭaipêk tuona hun hmang ninga tih.
II. “Nang Malsâwmna Ni Rawh” ti thupua March 29, 2025 a Seminar nei dinga an inpuocha mêk khawm buoina um loa a hun takah an hmang theina dingin.

09.03.2025 (Pathienni)

•HCFD Chawibiek Inkhâwm (Missionary Sunday)-Thuoit: Dr. Stephen, Ṭantu: Pi Hmingi Chhangte, Thuhrlitu: Pastor Lalsiesang Zote, Pastoral Prayer: Pastor Lalsiesang Zote.
•Ei member Nk. Ruth Zoṭahnieng Sinatein a enkawl Parvah Tuition Centre ta dingin: I. Naupanghaiin Pathien thu an mimal chitah hrietchiengna ṭha tak an nei a, hma an sawn a, Pathien malsawmna a thar taka an changna ding le hrisêlna ṭha lem an neina dingin II. Mr. Kamal khawm hun iemani chen a inthawka liver transplant ṭul, a châu leiin dâktawr haiin tuta a ngirhmun enin transplant thaw a la rem nawh an tia. Pathien ropuina dinga transplant thaw a ni vat theina dingin.

10.03.2025 (Thawtanni)

•Shiv Vihar ṭhalaihai hi sin ṭha an hmu theina ding le nuhmei pasal inzawngna kawngah khristien pasal le nuhmei kawppui an hmu theina ding le khristian sângku ṭha tak an indin theina dingin.
•Hari Viharah kristien sângkuo, indet nei, iemani zât bêk Lalpa’n a mi pêkna dingin.
•Ei Bible inchûklai Pu Lalngilnei Khawbung le Vijay khawmin an inchûkna ṭatakin an thaw zawm zinga theia. April thla bul khiin final exam ṭan an t’a, April 12th ah graduation day an nei

ding a nih. An inchûkna hmasak hih ṭha taka an hung zo theina dingin.

11.03.2025 (Thawleni)

•Shikohabad, UP Mission Field: I. Pathien ring thar tam tak a mi pêk sap peina dingin. II. Hmun dang danga inthawkin mi thar hung inkhawm an um deu zing hlak a, Pathienin chuonghai lungriah sin thaw a, ringtu ṭha tak an hung ni ngêina dingin. III. House visit hai khawm buoina um loa hlâwk taka nei a ni peina dinga Pathien vênghimna le umpuina.

12.03.2025 (Nilaini)

•HCFD Nilaini Zân ṭawngṭai Inkhâwm-Inkhâwm Keihruoit: Tv. Venson Chalthansung Varte, Thuhrlitu: Tv. David L. Singson.
•Rangpuri, Mahipalpur rawngbawlna khawm ringthar ei pung peina dingin.

13.03.2025 (Ningani)

•Shikohabad, UP Mission Field: I. Inrinni ṭhalai inkhâwm prawkram nei hlak a ni a, Lalpa’n mal a sâwm peina dingin. Chun ṭhalaihaiin inkhâwm nuomna lungril khawm an nei peina dingin. II. ṭhalai kawppui mamaw iemani zât an um a, chuonghai chu kawppui ṭha tak Lalpa’n a pêk sengna dingin. III. Sande Sikul naupanghai Pathien thu hrietna tienga an inṭhangliena, an hringnuna thlarau thlaichi thea um Lalpa’n a hun taka an ṭotirna ding le hmasawmna ṭha tak an nei peina dingin. IV. Tuition le music class a ṭhang ding Lalpa’n naupang tam tak a pêk sa peina dingin.

14.03.2025 (Zirtâwpni)

•Chanchin Ṭha puongdar rawngbawlna sinah HCFD-in hrat lema hma ei pan pei theina din (Marka 16:15, I Korin 9:16-18)
•Ei (HCFD) misawnari-haiin Pathien sukhratna le thawpuina a’n dawng thar peina ding le Chanchin ṭha hriidarna hmangruoah nasa lema Lalpa’n a hmang peina din.

15.03.2025 (Inrinni)

•India ram ṭhuituhaiin indik le fel taka ram an enkawl theina din: I. President, Prime Minister, Minister le MP-hai ta din II. State-hai a ṭhuitu-

hai ta din (1 Timothy 2:1-4)

•India rama Kristien Organization/NGO/Church Leader-hai ta dingin: Sawrkâr thuneituhai lakah buoina tuok lo a, hrat taka hma an lâk theina din III. Kristien Organization thuoitu le Church Leader-hai po po India ram siemthata le sukhmasawna dinga hmangruo pawimaw tak an hung ni pei theina din.

16.03.2025 (Pathienni)

•HCFD Chawibiek Inkhawm (SS L-2, Nehemia 2:1-20)-Thuoitu: Pastor Steven L. Infimate, Tantu: Dr. Lalthari, Pastoral Prayer: Pastor Steven L. Infimate.

•HCFD-in IEM a misawnari ei support Rev. Suraj Majhi a rawngbawlna le inzawma tawng-tainaa hriet ding: I. Damnawhai ta din-Pu Ajaib Singh, a mit inpân; Naute Dev, Thalassemia a na; Pi Shito Kaur, awm na. II. Ringtu nupuihai-in an sùng-le-kuo, ruol-le-pai le khuo-le vêng-hai kuomah Chanchin Tha hrat taka an hridar peina dingin.

17.03.2025 (Thawtanni)

•Shikohabad, UP Mission Field: I. Ringtharhai (ni kum a baptisma changhai) Lalpa'n a sukrât peina ding le annihai fethlenga Chanchintha an darzâu peina din. II. Naupang Sande Sikul tuong taka a fe peina ding le Naupanghai Pathien thu le hlai inthangliena, hmasawna tha tak an nei peina din. III. Lalpa'n Biek-in mi suol le thil tha lo a inthawk a mi vêngim pêk tlatna din. Chun biek-in kâwla khawsa sâkhuo dang zuituhai leh khawm inrem taka um tlang pei a ni theina din.

18.03.2025 (Thawleni)

•Rampuo: I. Myanmar-ah mipui insâwrkârna a ngîr nâwk theina ding le India thenum ramhaiah (Pakistan, Sri Lanka le dang dang) remna le muongna a um pei theina ding le ChanchinTha a'ndârzâu peina din. Middle East buoina, Russia-Ukraine indonahai hih palai themna hman-ga tha taka chingfel an hung ni theina din.

•Ramsûng: India ram North East States (Manipur, Nagaland le Assam) a helna le ralthuom cheleknhai sawrkâr thlungpuiin tha taka a chingfel vat theina ding, remna-le-muongna a umna ding le hmasawna hratlema a hung um theina din.

19.03.2025 (Nilaini)

•HCFD Nilaini Zân Tawngtai Inkhawm-Inkhawm Keihruoit: Tv. Fimrawsang Infimate, Thuhritu: Pi Zarzokim Inbuon.

•India rama hin kristienhai chungatharum insuona/thawluina chi dang dang a tlung inzing hle: Feb. 6, 2025 khan Sonbhadra (Uttarpradesh) a Pastor Chotelal chu sakhuo inletna thil le inzawma indiklo taka intumin, police in an thuoit. Jharkhand-a Latehar khuoa kristienhaiin tui le nitin mamaw thil an dawng/hmu hlak chu Feb. 3, 2025 a inthawk khan suktâwp pek an nih. Feb. 15, 2025 khan Kanker (Chhattisgarh) a kristienhai inkhawm lai chu ringnawtu thenkhatin chawkbuiin, an intâwpluitir. Sukdûdâna le nêkchêpna hmunahai hin Chanchin Tha hridara a um zuol peina dingin.

20.03.2025 (Ningani)

•Shikohabad, UP Mission Field: I. Sivara, Farukhabad district-ah Pi Rajrani fethlengin Pathi-

enni inkhawmna nei hlak a ni a. Pathien malsawmna dawng a, mi tin sukrâta an um peina dingin. II. Lilma, Budaun district a Pi Reshma fe thlenga inkhawmna Lalpa'n nasa takin mal a sâwm a. Naupang khawm 20-30 lai an um thu dawng a nih. Mipuihai tha taka enkawl, inçûktir le keihruoi an tûl hle. Pathien dit dân a hma lâk pei a ni theina dingin. III. Ms. Geeta Devi (mi thar) phîngpui cancer a neia. Taksa le thlarau damna a changna ding le ama fe thlenga Pathien thilthawtheina suklanga a umna dingin.

21.03.2025 (Zirtâwpni)

•Ram le hnam ta dingin: I. Inruithei ngawlvawinaa (drug addiction/abuse) intâng mi tamtak, abiktakin thalaihai lai, an um. Inruithei hin kristien sùngkuo le khawtlâng nasa takin a suksiet a, hnam hmasawna ding dâltu pakhat a ni ve nih. Inruithei hih ei hnam sùngah nasa lema do a ni theina ding le inruithei ngawlvaw (drug addicts) hai inruithei sal a'nthawka an hung zalen theina dingin II. Hnam thuoituhai ta dingin. III. Manipur buoina le inzawmin inthuruol taka hnamin kal a chawi theina dingin.

22.03.2025 (Inrinni)

•Shikohabad, UP Mission Field rawngbawlna: I. Lalpa' n biek-in a mi vêngim pêk tlatna dingin. Mi tam takin harsatna a inthawka damna le zalênna an changna hmun a ni ngeina dingin. II. Shikohabad le a sêvêlah mi tin kuomah Chanchin tha an dar peina ding le thutak zawngtu hai khawma an thil zawng an hung hmu suok peina dingin. III. Kohran hai hrilsêlna tha an nei sengna dingin. Sin an va thawna hmunah ringumna, indikna, taimâkna le Kristien zie an suklang theina dingin. IV. Zântieng sùngkuo inkhawmna hun le inpantuo inkhawmna hun kohran member thenkhatin an nei hlak a. Thlarau malsawmna tam tak dawnga Lalpa' n an inpawl tlangna mal a sâwm peina dingin.

23.03.2025 (Pathienni)

•HCFD Chawibiek Inkhawm-Inkhawm Keihruoit: Pu Lalramlien Inbuon, Tantu: Pi Esther L. Hmar, Thuhritu: Upa Dr. Lalsiemlien Pulamte, Pastoral Prayer: Upa Dr. Lalsiemlien Pulamte.

•Zing 24 March, 2025 khin ei hmun thubui (land case) Court in a ngaituo ding (listed) a nih. Court Hearing a um ngêi theina ding le land case hi sukfela a hung um vat theina dingin. Chun, biek-in ei nei vat theina ding khawmin Pathien kuomah ngen ei tiu.

24.03.2025 (Thawtanni)

•Bethany Convent School: I. Thawktuhaiin taksa hriseina tha tak an nei pei theina ding le naupanghai enkawl themna le remhrieta tha Pathien a inthawk an dawng thar peina ding khawmin II. Tawng thuah harsatna nei (tawng fie theilo le tawng thei si tawng nuom thak lo) naupang iemani zât an um a, thataka enkawl an ni theina dinga zirtirtuhaiin Pathien thangpuina an dawng thar peina dingin.

25.03.2025 (Thawleni)

•India rama nêkchêpna a hluor zuolna hmun kristienhai ta din: EFI RLC March 2025 Prayer Calendar-a an suklang dânin Uttar Pradesh(UP) hih ringtuhai nêkchêpna a hluor zuolna pawl tak a nih. Feb. 2025 sùng khan ringtuhai chungathawluina/inthitheina chi dang dang a tlung.

Kristien thenkhat an inkhawm lai chawkbuiin an um; pastor thenkhat chu inkhawm an nei laia police-in an man an um baw. Pastor le ringtu thenkhat chu sakhuo inletna thil le inzawma police-ah thukhêla hêkin an um baw. UP-a hin kristienhai dikna chanvo (abiktakin sakhuo zalenna) India Dânpuia inziek anga kengkaw pêk an ni theina dingin.

26.03.2025 (Nilaini)

•HCFD Nilaini Zân Tawngtai Inkhawm-Inkhawm Keihruoit: Pu VK Pangamte, Thuhritu: Tv. Ramsiemlien Thiek.

•HCFD-in tawngtai, thilpêk le kawng hrang hranga ei rawngbawlnaah hrat lema hma ei sawn pei theina dingin.

27.03.2025 (Ningani)

•HCFD Naupang Sande Sikul Dept.: I. Kum 2025 sùng hin taksa le thlarauah nasa lema hma an sawn theina dingin. II. Naupanghai po poin lungril ngaituona le taksa inthanglienna tha tak an hung nei seng theina dingin (Luka 2:52) III. Zirtirtuhai po poin naupanghai enkawl le inçûktir themna tha Pathien a inthawk an dawng thar peina dingin (Thuvahai 22:6).

28.03.2025 (Zirtâwpni)

•Bible semdar le Chanchin Tha puongdar sin: I. Bible semdarnaa hmalatuhai, Bibles for the World, Gideons International, Bible Society of India, Delhi Hmar Publication Board (Delhi Version) le danghai ta dingin. II. Hi sin hih hratlema a fe theina dingin III. Bible la hmu lo/tiem lo ha'n an hmu a, an hung tiem seng theina dingin (Khawvêlah mihriem tûkledingâwn 8.08 umhai lai tûkledingâwn 3.42 zetin Chanchin Tha hi mumal takin an la hriet/dawng naw niin Global Frontiers Mission chun a târlang-<https://www.globalfrontiermissions.org>)

29.03.2025 (Inrinni)

•HCFD Nuhmei Pâwlin "Nang Malsawmna Ni Rawh"ti thupuiin wawisun hin seminar an nei ding. Hlawtling taka hun hman a ni ngêina dingin.

•HCFD Department tin le vêngbuk tin a thuoituhai ta dingin. Pathien a inthawka varna tha dawnga, Pathien ditdâna an mawphurnahai an phursuok pei theina dingin.

30.03.2025 (Pathienni)

•Wawisuna kum 2025-2027 sùnga dinga HCFD Executive Committee, Nuhmei Pâwl le Thalai Pâwl Thuoitu inthlang ding le inzawmin.

•All India HCFs hai po poin Chanchin Tha puongdarna dinga ei mawphurna hrat taka ei phursuok pei theina dingin.

31.03.2025 (Thawtanni)

•Lawmthu hrilna: I. Thla tâwp thuoit lungla ei um leiin. II. Mission field a ei rawngbawlnahai a fe tuong pei a, ei misawnari/thawktuhai hmalâkna Lalpa'n mal a sâwm zawm zing leiin. III. Tawngtai, thilpêk le kawng hrang hranga rawngbawlna hun tha Lalpa'n a mi la pêk pei lei khawmin.

•Sulthuphachawina (1 John 1:9-10) le Pathien kuoma inhlantharna (Rom 12:1-2).